

卷十三

人物列傳

卷十四

人物列傳

卷十五

列女列傳

卷十六

古今人表

廣宗縣志

瞿宣穎署

廣宗縣志卷十三

大物列傳

方志登載人物弊多失於攀附昔賢曾言之矣紀文達安陽縣志序惟是州邑疆域分析

變更歷代賢哲因歲遠年湮不能細從村里分別無可如何亦誠有如順德府

志所云者乾隆順德府志徐氏景會語廣宗自漢時置縣其地實兼有今之威縣元代遷移

新治而幅員仍爲古廣宗宗城舊地說詳地輿略故凡正史所書廣宗宗城人如孟

康以下諸人舊志及順德府志均載入本縣自屬未可刪削元之劉賡史稱洛

水其實籍隸本縣說見列傳第一舊志未載特爲補入義各有當固非借才異地也至

於傳人物者區分門類亦爲一時積習夫方人之事聖且不暇鄒枚不冠以文

苑四皓不列爲隱逸良史具有先例茲故取邑先賢行誼相同者分篇類次不

復加以品目鄉里庸行一善之長或爲前志所載或由採訪所得剪除浮辭備

著事蹟據實直書不爲溢美徇情阿好乞金索米之咎庶幾免矣

列傳第一

孟 康

潘永基

陳元康弟季璩

潘 樂子子晃

潘好禮

胡珣

范質子曼姪杲

魏廷式

劉賡

三國魏

孟康字公休安平廣宗人黃初中以與郭后有外屬並受九錫賜拜遂轉爲散騎侍郎是時散騎皆以高才英儒充其選而康獨緣妃嬙難在其間故于時皆共輕之號爲阿九康既無才敏因在冗官博讀書傳後遂有所彈駁其文義雅而切要衆人乃更加意正始中出爲弘農領典農校尉康到官清已奉職嘉善而矜不能省息獄訟緣民所欲因而利之郡領吏二百餘人涉春遣休常四分遣一事無宿諾時出案行皆豫勅督郵平水不得令屬官遣人探候修設曲敬又不欲煩損吏民常豫勅吏卒行各持鐮所在刈馬草不止亭傳露宿樹下又所從常不過十餘人郡帶道路其諸過賓客自非公法無所出給若知舊造之自出於家康之始拜衆人雖知其有志量以其未嘗宰牧不保其能也而康恩澤治能乃爾吏民稱歌焉嘉平末徙渤海太守徵入爲中書令後轉爲監封廣陵亭侯

三國志杜
畿傳注

北魏

潘永基字紹業長樂廣宗人父靈虬中書侍郎永基性通率輕財好施爲冀州鎮東府法曹行參軍遷威烈將軍揚州曲陽戍主轉西硤石戍主治陳留南梁二郡事頗有威惠轉揚州車騎府主簿累遷虎賁中郎將直寢前將軍出爲持節平北將軍冀州防城都督長樂太守于時葛榮攻信都長圍渴水以灌州城永基與刺史元孚同心戮力晝夜防拒外無軍援內乏糧儲從春至冬力窮乃陷榮欲害孚永基請以身代孚死永安二年除潁川太守遷鎮東將軍東徐州刺史時蕭衍將曹世宗馬洪武等率衆來寇永基出討破之永熙中爲征東將軍金紫光祿大夫遷車騎將軍左光祿大夫尋加衛大將軍復除東徐州刺史前後在州爲吏民所樂代還京師元象初卒年五十六贈散騎常侍都督冀瀛三州諸軍事驃騎大將軍尙書右僕射司徒公冀州刺史長子子禮州主簿子義學涉有父風仕隋至尙書右丞

北史

北齊

陳元康字長猷廣宗人也父終德魏濟陰內史元康貴贈度支尙書謚曰貞元康頗涉文史機敏有幹用魏正光中從李崇北伐以軍功賜爵臨清男普泰中除主書累遷司徒高昂記室初司馬子如高季式與孫搴劇飲搴醉死神武命求好替子如舉

魏收他日神武謂季式曰卿飲殺我孫主簿魏收作文書都不稱我意司徒嘗道人謹密是誰季式以元康對曰是能夜闇書快吏也召之一見便授大丞相功曹內掌機密善陳事意不爲華藻遷大行臺都官郎封安平子軍國多務元康問無不知神武臨行留元康在後馬上所號令九十餘條元康屈指數之盡能記憶神武甚親之曰如此人世間希有我今得之乃上天降佐也時趙彥深亦知機密人謂之陳趙而元康勢居趙前性又柔謹神武之伐劉蠡升天寒雪深使人舉氈元康於氈下作軍書颯颯運筆筆不及凍俄傾數紙及出神武目之曰此何如孔子耶神武嘗怒文襄親加歐蹋極口肆罵以告元康元康俯伏泣下霑地曰王教世子過矣神武曰我性急曠阿惠常如此元康大啼曰一度爲甚况常然耶神武自是爲之懲忿時或患撻輒曰勿使元康知又謂左右曰元康用心誠實必與我兒相抱死高仲密之叛神武知其由崔暹將殺之文襄匿暹爲之請神武曰我爲爾不殺然須與苦手文康乃出暹而謂元康曰暹若得杖不須見我及暹見神武將解衣受罰元康趨入止伍伯因歷階升曰王方以天下付世子有一崔暹不能免其杖父子尙爾况世間人耶神武意解曰不由元康崔暹得一百乃捨之文襄入輔居鄴下崔暹崔季舒崔昂等並

被任用張亮張徵纂並爲神武待遇然皆出元康下神武每與元康久語文襄門外待接之時人語曰三崔二張不如一康左衛將軍郭瓊以罪死子婦范陽盧道虞女也沒官神武啓以賜元康爲妻元康地寒時以爲殊賞元康遂棄故妻李氏識者非之元康便辭善事人而不能平心處物溺於財利受納金帛不可勝紀責負交易遍於州郡爲清論所譏從神武於芒山將戰遺失陣圖元康冒險求得之西師旣敗神武會諸將議進取策或以爲人馬疲瘦不可遠追元康曰兩雄交爭歲月已久今得大捷便是天授時不可失必須乘勝追之神武曰若遇伏兵孤何以濟元康曰前沙苑還軍彼尙無伏今者奔敗何能遠謀捨之必成後患神武不從累遷大行臺左丞及神武疾篤謂文襄曰芒山之戰不用元康言方貽汝患以此爲恨死不瞑目事皆當與元康定也神武崩祕不發喪惟元康知之文襄嗣事自晉陽將之鄴令元康預作神武條教數十紙留付段孝先趙彥深在後以次行之別封昌國縣公以從嘉名侯景反文襄逼於諸將欲殺崔暹以謝之元康諫曰今枉殺無辜虧廢刑典豈直上負天神何以下安黎庶勗錯前事願公愼之文襄乃止高岳討侯景未克文襄欲遣潘相樂副之元康曰相樂緩於機變不如慕容紹宗且先王有命稱堪敵景時紹宗

在遠文襄欲召見之恐其驚叛元康曰紹宗知元康特蒙顧待新使人來餉金以致誠欵元康欲安其意故受之而厚答其書保無異也乃任紹宗遂破景賞元康金五十斤王思政入潁城諸將攻之不能拔元康進曰公自匡朝政未有殊功雖敗侯景本非外賊今潁城將陷公因而乘之足以取威定業文襄令元康馳驛觀之復命曰必可拔文襄乃親征潁川益發衆軍決既至而克之賞元康金百鎰初魏朝授文襄相國齊王諸將皆勸恭膺朝命元康以爲未可崔暹因間之薦陸元規爲大行臺郎欲分元康權元康既貪貨賄文襄內漸嫌之又欲用爲中書令以閑地處之事未施行屬將受魏禪元康與楊愔崔季舒並在坐將大遷除朝士共品藻之文襄家倉頭蘭固成掌厨與其弟阿改謀害文襄阿改時事文宣常執刀從期聞東齋叫卽加刃於文宣時文宣別有所之未還而難作固成因進食置刀盤下而殺文襄元康抱文襄文襄曰可惜可惜與賊爭刀髻解被刺傷重腸出猶手書辭母口占祖孝徵陳權宜至夜而終時年四十三秘文襄凶問故殯元康於宮中託以出使南境盧除中書令明年乃贈司空謚曰文穆元康卒後母李氏哀感發病而終贈廣宗郡君謚曰貞昭元康子善藏嗣善藏溫雅有鑒裁位給事黃門侍郎隋開皇中尙書郎大業初卒

於彭城郡贊務元康弟湛官至大鴻臚次季璩鉅鹿太守轉美州別駕平秦王歸彥反季璩守節不從因而遇害贈衛尉卿趙州刺史

北史
魏書

潘樂字相貴廣寧石門人本廣宗大族魏世分鎮北邊因家焉父永有技藝襲爵廣宗男樂初生有一雀止其母左肩占者咸言富貴之徵因名相貴後始爲字及長寬厚有膽略初歸葛榮榮授京兆王時年十九榮敗隨爾朱榮爲別將討元顥以功封敷城縣男齊神武出牧晉州引樂爲鎮城都將後從破爾朱兆於廣阿進爵廣宗縣伯累以軍功拜東雍州刺史神武嘗議欲廢州樂以東雍地帶山河境連胡蜀形勝之會不可棄也遂如故後從破周師於河陰議欲追之令追者在西不願者東唯樂與劉豐居西神武善之以衆之不同而止改封金門郡公文宣嗣事鎮河陽破西將楊標等時帝以懷州刺史平鹽等所築城深入敵境欲棄之樂以輒關要害必須防固乃更修理增置兵將而還還鎮河陽拜司空齊受禪樂進璽綬進封河東郡王遷司徒周文東至崤陝遣其行臺侯莫陳崇齊子嶺趨輒關儀同楊標從鼓鐘道出建州陷孤公成詔樂總大衆禦之樂晝夜兼行至長子遣儀同韓永興從建州西趣崇崇遂遁又爲南道大都督討侯景樂發石鰲南度百餘里至梁涇州涇州舊在石梁

侯景改爲淮州樂獲其地仍立涇州又克安州之地除瀛州刺史仍略淮漢天保六年薨於懸瓠贈假黃鉞太師大司馬尚書令子子晃嗣諸將子弟率多驕縱子晃沈密謹慤以清靖自居尙公主拜駙馬都尉武平末爲幽州道行臺右僕射幽州刺史周師將入鄴子晃率突騎數萬赴援至博陵知鄴城不守詣冀州降周齊王軍授上開府隋大業初卒

北史

唐

潘好禮貝州宗城人第明經累遷上蔡令治行最擢監察御史坐小累下除芮城令拜侍御史徙岐王府司馬居後母喪詔奪服固辭不出開元初爲邵王府長史王爲滑州刺史好禮兼府司馬知州事王御下不能肅有詔好禮檢督王家至過失皆上聞王每游觀好禮必諫諭禁切農月王出獵家奴羅邈好禮遮道諫王初不許乃臥馬下諄曰今農在田王何得非時暴禾稼以損下人要先踐殺司馬然後聽所爲王慙爲還遷豫州刺史勤力於治清廉無所私然喜察細事下厭其苛子請舉明經好禮曰經不明不可妄進乃自試之不能通怒答之械而徇於門復以公累徙溫州別駕卒好禮博學能論議節行修整一意無所傾附未嘗自列階勳居室服用麤苟至

終身世謂近名

新唐書

胡珣字潤博宗城人祖秀武后時以文材徵爲麟臺正字父宰臣進士官平陽冀氏令贈潭州大都督珣早孤能自勤學立節概非其身力不以衣食一試進士二卽吏部皆上第爲富平尉一府稱其斷決建中四年侍郎趙贊爲度支薦珣爲監察御史主餽給渭橋以東軍洗手奉職不以一錢假人賊平遷河南倉曹賈耽鎮鄭滑以珣佐觀察事檢校尙書工部員外郎以不阿附權貴除獻陵令居陵下七年市置田宅務種樹爲業以自給教授子弟貞元十一年吏部大選以珣考選人藝學以勞遷奉先令以治辦遷尙書膳部郎中改坊州刺史州經亂無孔子廟珣至命築宮造祭器率博士生講讀以時如法以祀人吏聚觀歎息遷舒州刺史州歲大熟麥一莖兩穗聞里歌舞之遷尙書駕部郎中以事犯尙書李巽降鳳翔少尹巽死遷少大理改少詹事元和十二年拜少府監兼知內中尙明年病卒子七皆有學守

珣舊志無傳節錄韓昌黎集

宋

范質字文素大名宗城人父守遇鄭州防禦判官質生之夕母夢神人授以五色筆九歲能屬文十三治尙書教授生徒後唐長興四年舉進士爲忠武軍節度推官遷

封邱令晉天福中以文章干宰相桑維翰深器之卽奏爲監察御史及維翰出鎮相州歷泰寧晉昌二節度皆請質爲從事維翰再相質遷主客員外郎直史館歲餘召入爲翰林學士加比部郎中知制誥契丹侵邊少帝命漢祖等十五將出征是夜質入直少帝令召諸學士分草制質曰宮城已閉恐泄機事獨具草以進辭理優贍當時稱之漢初加中書舍人戶部侍郎周祖征叛每朝廷遣使齎詔處分軍事皆合機宜周祖問誰爲此辭使者以質對歎曰宰相器也周祖自鄴起兵向闕京城擾亂質匿民間物色得之喜甚時大雪解袍衣之且令草太后詔及議迎湘陰公儀注質蒼黃論撰稱旨迺白太后以質爲兵部侍郎樞密副使周廣順初加拜中書侍郎平章事集賢殿大學士翌日兼參知樞密院事郊祀畢進位左僕射兼門下侍郎平章事監修國史從征高平還加司徒弘文館大學士顯德四年夏從征壽州還加爵邑質建議以律條繁冗輕重無據吏得因緣爲奸世宗特命詳定是爲刑統六年夏世宗北征質病留京師賜錢百萬俾市醫藥及平關南至瀛州質見於路左師還以樞密使魏仁浦爲相命質與王溥並參知樞密院事世宗不豫入受顧命恭帝嗣位加開府儀同三司封蕭國公及太祖北征爲六師推戴自陳橋還府署時質方就食閣中

太祖入率王溥魏仁浦就府謁見太祖對之嗚咽流涕具言擁逼之狀質等未及對軍校羅彥瓌舉刃擬質曰我輩無主今日須得天子太祖叱彥瓌不退質不知所措乃與溥等降階受命宋初加兼侍中罷參知樞密俄被疾太祖征澤潞幸其第賜黃金器二百兩銀器千兩絹二千匹錢二百萬太祖初卽位庶事謙抑至於藩戚尙未崇建幕府賓佐未列於位質因上奏曰自古帝王開基創業封建子弟樹立磐維宗戚旣隆社稷永固伏見皇弟泰寧軍節度使光義自居戎職特負將材及領藩維尤積時望嘉州防禦使光英雄俊老成修身樂善嘉譽日聞乞並行封冊申錫命書皇子皇女雖在襁褓者亦乞下有司許行恩制此臣之願也臣又聞爲宰相者當舉賢能以輔佐天子竊以端明殿學士呂餘慶樞密副使趙普精通治道經事霸府歷歲滋深覩其公忠誠堪毗倚乞授以台司俾申才用帝嘉納之先是宰相見天子議大政事必命坐面議之從容賜茶而退唐及五代猶遵此制及質等憚帝英睿每事輒具劄子進呈且言曰如此庶盡稟承之方免妄庸之失帝從之由是奏御浸多始廢坐論之禮乾德初帝將有事園丘以質爲大禮使質與鹵簿使張昭儀仗使劉溫叟討論舊典定南郊行禮圖上之帝尤嘉獎由是禮文始備質自爲序禮畢進封魯國

公質奉表固辭不允二年正月罷爲太子太傅九月卒年五十四將終戒其子旻勿請謚勿刻墓碑太祖聞之爲悲惋罷朝贈中書令賜絹五百匹粟麥各百石質力學強記性明悟舉進士時和凝以翰林學士典貢部覽質所試文字重之自以登第名在十三亦以其數處之貢闈中謂之傳衣鉢其後質登相位爲太子太傅封魯國公皆與凝同云初質既登朝猶手不釋卷人或勞之質曰有善相者謂我異日位宰輔誠如其言不學何術以處之後從世宗征淮南詔令多出其手吳中文士莫不驚服質每下制敕未嘗破律命刺史縣令必以戶口版籍爲急朝廷遣使視民田按獄訟皆延見爲述天子憂勤之意然後遣之世宗初征淮南駐壽濠銳意攻取且議行幸揚州質以師老與王溥泣諫乃止及再駕揚州因事怒竇儀罪在不測質入謁請見世宗意其救儀起避之質趨前曰儀近臣也過小不當誅因免冠叩頭泣下曰臣備位宰相豈可使入主暴怒致近臣於死地耶願寬儀罪世宗意遂解復坐卽遣赦儀質性卞急好面折人以廉介自持未嘗受四方饋遺前後所得祿賜多給孤遺閨門之中食不異品身沒家無餘貲太祖因論輔相謂侍臣曰朕聞范質止有居第不事生產真宰相也太宗亦嘗稱之曰宰輔中能循規矩慎名器持廉節無出質右者但

欠世宗一死爲可惜爾從子校書郎杲求奏遷秩質作詩曉之時人傳誦以爲勸戒

有集三十卷又述朱梁至周五代爲通錄六十五卷行於世子旻姪杲邵氏聞見前錄云范魯公

質舉進士和凝爲主文愛其文賦擬自以爲第十三登第謂魯公曰君之文宜冠多士屈居第十三者欲傳老夫衣鉢耳魯公以爲榮至先後爲相有獻詩者曰從此廟堂添盛事登庸衣鉢亦相傳又范魯公質隱於民間一日坐封邱巷茶肆中有人貌怪陋前揖曰相公無恙時暑中公所執扇偶書大暑似酷吏清風來故人詩二句其人曰世之酷吏冤獄何止如大暑也公他日當深究此弊因携其扇去公惘然久之後至佛廟後門見一土偶短鬼其貌肖茶肆中見者扇亦在手中公心異焉亂定周祖輕物色得公遂至大用公見周祖首建議律條繁冗輕重無據吏得因緣以爲奸特加詳定是爲刑統

旻字貴參十歲能屬文以父任右千牛備身太子司儀郎累遷著作佐郎宋初爲度支員外郎判大理正事俄知開封縣太宗時領京尹數召與語頗器重之嶺南平遷知邕州兼水陸轉運使俗好淫祀輕醫藥重鬼神旻下令禁之且割已奉市藥以給病者愈者千計復以方書刻石置廳壁民感化之會南漢知廣州官鄧存忠劫土人二萬衆攻州城七十餘日旻屢出親戰矢集於胸猶激勵將卒殊死戰賊遂少却病創日篤堅壁固守遣使十五輩求援廣州救兵至圍解賜璽書獎之旻病甚詔令有司以肩輿載歸闕下疾愈通判鎮州有能聲賜錢二百萬遷庫部員外郎開寶九年知淮南轉運事太宗謂旻曰朕今委卿以方面之重凡除民隱急軍須之務悉以便

宜從事無庸一一申覆也歲運米百餘萬石給京師當時稱有心計太平興國初召爲水部郎中錢俶獻地以旻爲考功郎中權知兩浙諸州軍事旻上言俶在國日徭賦繁苛凡薪粒蔬菓箕帚之屬悉收算欲盡釋不取以蠲其弊從之車駕征晉陽上書求從召爲右諫議大夫三司副使判行在三司又兼吏部選事師還加給事中坐受人請求擅市竹木入官爲王仁瞻所發貶房州司戶量移唐州六年卒年四十六有集一十卷邕管記三卷其後子貽孫上言詔復舊官貽孫官至主客員外郎

杲字師回父正青州從事杲少孤質視如己子刻志於學與姑臧李均汾陽郭昱齊名爲文深僻難曉後生多慕效之以陰補太廟齋郎再遷國子四門博士嘗攜文謁陶穀寶儀咸大稱賞謂杲曰若舉進士當待汝以甲科及秋試有上書言閱閱之家不當與寒士爭科第杲遂不應舉稍遷著作佐郎出爲許鄧二州從事坐事免太平興國初遷著作郎直史館歷右拾遺左補闕雍熙二年同知貢舉俄上書自言其才比東方朔求顯用以觀其效太宗壯之擢知制誥杲家貧貸人錢數百萬母兄晞性嗜嘗爲興元少尹居京兆殖貨鉅萬親故有自長安來者給杲曰少尹不復靳財物已揮金無算矣杲聞之喜因上言兄老求典京兆以便養太宗從其請改工部郎中

罷知制誥杲既至而晞咨如故且常以不法事干公府杲大悔杲視事踰年境內不治會賊帥劉渥剽掠屬縣吏卒解散遂驚悸成疾移知壽州杲上言家世史官願秉直筆成國朝大典召爲史館修撰固求掌誥詞帝從之時翰林學士宋白左遷鄜州賈黃中李沆參知政事蘇易簡轉承旨連致書宰相求爲學士且言於宰相李昉曰先公嘗授以制誥一編謂杲才堪此職因出示昉屢開解之未幾太宗飛白書玉堂額以賜翰林杲又上玉堂記因請備職太宗惡其躁競改右諫議大夫知濠州復召爲史館修撰初太宗以太祖朝典策未備乃議召杲杲聞命喜甚以爲將加優擢晨夜趨進至宋州遇朗州通判錢熙杲問以朝議將任僕何官熙言重修太祖實錄爾杲默然久之感疾至京師旬日卒年五十六太宗閱之錄其二子杲性虛誕與人交好面譽背非惟與柳開善更相引重始終無間不善治生家益貧杲端坐終日不知計所出人皆笑之子坦亦登進士第

質及晏杲均見宋史本傳

魏廷式字君憲大名宗城人少明法學嘗客遊趙州舍于監軍魏咸美之廨廨有西堂素凶咸美知廷式有膽氣命居之卒無恙來京師咸美弟咸信延置館舍以同宗善待之太平興國五年中第釋褐朗州法曹掾轉運使李維清以其吏材奏知桃源

縣遷將作監丞端拱初改著作佐郎通判潁州淳化二年始命李昌齡判審刑院以廷式明練刑章奏爲詳議官屢進對太宗悅其明辯遷太子左贊善大夫時初較廷臣殿最命廷式與樞密都承旨趙鎔李著同勾當三班多所規制越王生日令持禮物賜之超拜主客員外郎判三司都勾院換河南東道判官改戶部員外郎知利州李順爲盜就命充陝西至益州路轉運使後入奏事太宗謂曰有事當白中書廷式曰臣三千七百里外乘驛而至以機事上聞願取斷宸衷非爲宰相來也卽不時召對問方略稱旨賜錢五十萬令還任賊平知寧州未至召入判大理寺至道初乘傳河朔決獄復出知宋潭二州湖南地土衍沃民喜訟產有根柢巧僞難辯者廷式立裁之吏民咸服眞宗卽位改刑部會王繼恩有罪下吏命廷式同按之踰宿而獄具俄知審官院通進銀臺封駁司拜右諫議大夫知審刑院出知涇州咸平二年卒年四十九錄其子攝太常寺太祝舜卿爲太祝禹卿同學究出身廷式所至以嚴明稱剛果敢言爲人主厚遇然性傾險喜中傷人士君子憚其口而鄙其行

宋史

元

劉賡字熙載洛水人五世祖逸以郡吏治獄有陰德祖肅爲右三部尙書賡幼有文